

**CONVENIO DE COLABORACIÓN ENTRE A EXCMA. DEPUTACIÓN PROVINCIAL DE PONTEVEDRA E O EXCMO. CONCELLO DE MEAÑO PARA A EXECUCIÓN DO PROXECTO “HUMANIZACIÓN E MELLORA DA SEGURIDADE VIAL NA RÚA CAMPO DA FEIRA, NO ENTORNO DA CASA CONSISTORIAL. CONCELLO DE MEAÑO”**

**Documento asinado electrónicamente por:**



Pode verificar a integridade deste documento  
no enderezo: <https://sede.depo.gal>  
Código seguro de verificación (CSV): TVY0UMQ2F7L50S3Q

**CONVENIO DE COLABORACIÓN ENTRE A EXCMA. DEPUTACIÓN PROVINCIAL DE PONTEVEDRA E O EXCMO. CONCELLO DE MEAÑO PARA A EXECUCIÓN DO PROXECTO “HUMANIZACIÓN E MELLORA DA SEGURIDADE VIAL NA RÚA CAMPO DA FEIRA, NO ENTORNO DA CASA CONSISTORIAL. CONCELLO DE MEAÑO”**

**INTERVEÑEN**

D. Luis López Diéguez, na súa condición de presidente da Deputación de Pontevedra, actuando en virtude da competencia que lle atribúe o artigo 34.1.b) da Lei 7/1985, de 2 de abril, reguladora das bases do Réxime local.

D. Carlos Vieitez Fernández, alcalde do Concello de Meaño, actuando en virtude das facultades representativas que lle atribúe o artigo 21.1.b) da Lei 7/1985, de 2 de abril, reguladora das bases do Réxime local.

D. Carlos Cuadrado Romay, secretario xeral da Deputación Provincial de Pontevedra, dando fe da formalización.

Ambas partes recoñécense con capacidade para formalizar o presente convenio, en base ós principios de colaboración, cooperación, coordinación e eficacia que deben presidir as actuacións das Administracións Públicas.

**MANIFESTAN**

I.- Que os convenios entre as Administracións Públicas constitúen o instrumento adecuado para desenvolver a súa cooperación en cuestións de interese común, tal como establecen os art. 47 e seguintes da Lei 40/2015, de 1 de outubro, de réxime xurídico do sector público, 57 da Lei 7/85, de 2 de abril, reguladora das bases do réxime local e 198 e seguintes da Lei 5/97, de 22 de xullo, de Administración Local de Galicia.

II.- Que a Deputación de Pontevedra, está concienciada sobre a necesidade de aumentar a seguranza viaria en toda a rede de estradas da provincial, facendo especial fincapé nos tramos que transcorren por espazos urbanos ou núcleos rurais dos distintos concellos, dando cumprimento a asistencia que debe prestar segundo disposto no artigo 36 da Lei 7/85, de 2 de abril, reguladora das bases de réxime local. Por ese motivo, o organismo provincial quere levar a cabo intervencións neste senso no seu propio viario e está a facer unha replanificación profunda e conceptual das actuacións en materia de mobilidade, con especial fincapé na protección dos colectivos máis vulnerables: peóns, ciclistas e persoas con mobilidade reducida. O obxectivo é conformar un contorno viario seguro e tranquilo, fomentando a convivencia de todos os medios de transporte e sistemas de desprazamento, así como repartir de xeito



equitativo o espazo público. Quérese garantir que vías provinciais ofrezan unha mobilidade universal nun espazo continuo de seguranza viaria.

III.- Que segundo dispoñen os artigos 26.1 da Lei 7/1985, de 2 de abril, reguladora das bases do réxime local e 81 da Lei 5/1997, de 22 de xullo, de Administración Local de Galicia, os municipios deberán prestar ós seus cidadáns, determinados servizos públicos en función da súa poboación.

IV.- Que o artigo 36 da Lei 7/1985 e os artigos 109 e 110 da Lei 5/1997 encomendan ás deputacións a que dirixan a súa actividade a asegurar a prestación integral e adecuada dos servizos de competencia municipal, a tal efecto, e co fin de posibilitar a consecución real e efectiva dos mesmos, é polo que se instrumenta o presente convenio dirixido ó cumprimento das obrigacións impostas pola normativa vixente.

V.- Que a Deputación de Pontevedra é titular da estrada provincial E.P. 9303 Meaño - Dena, que transcorre polo concello de Meaño. Está categorizada como rede local no catálogo de estradas provinciais.

VI.- Que o estado actual da E.P. 9303 Meaño – Dena no ámbito de actuación do proxecto, dende o punto quilométrico 0+000 ata o punto quilométrico 0+100, presenta características propias dun treito urbano, cun carril de circulación por sentido, bandas de aparcamento en liña e beirarrúas en ambas as marxes, pero cuns anchos que incumpren os parámetros actuais de accesibilidade e mobilidade universal.

Co fin de realizar unha replanificación profunda e conceptual en materia de mobilidade dende o P.Q. 0+000 ata o P.Q. 0+100 da E.P. 9303 Meaño – Dena (Rúa Campo da Feira), buscando en todo momento fomentar a convivencia de todos os medios de transporte e sistemas de desprazamento, así como repartir de xeito equitativo o espazo público, decídese redactar o proxecto de *"Humanización e mellora da seguridade vial na Rúa Campo da Feira, no entorno da Casa Consistorial. Concello de Meaño"*, coa finalidade de dar resposta ás necesidades actuais en materia de mobilidade.

O proxecto desenvólvese na súa integridade no Concello de Meaño, actuando no treito comprendido entre o P.Q. 0+000 e o P.Q. 0+100 da E.P. 9303 Meaño – Dena (Rúa Campo da Feira), co fin de mellorar a seguridade e a mobilidade dos peóns grazas á construción dunha zona de convivencia en plataforma única, con prioridade de uso en favor do peón e non do vehículo motorizado, recuperando e ofrecendo así unha maior superficie de espazo público para o uso e desfrute dos colectivos máis vulnerables, utilizando para a execución da zona de convivencia materiais nobres que dignifiquen o espazo público existente, mellorando a calidade ambiental e a integración paisaxística con mobiliario urbano de deseño e vexetación autóctona.



VII.- Con fundamento en canto queda exposto, e sendo patente a vontade de colaboración das entidades comparecentes, ámbalas dúas partes acordan a subscripción do presente convenio, consonte ás seguintes:

## CLÁUSULAS

### **Primeira.- Obxecto.**

O obxecto do presente convenio é establecer as condicións que rexerán a colaboración entre a Deputación de Pontevedra e o Concello de Meaño para a execución do proxecto de *“Humanización e mellora da seguridade vial na Rúa Campo da Feira, no entorno da Casa Consistorial. Concello de Meaño”*.

O proxecto contempla a execución dunha zona de convivencia en plataforma única, con prioridade de uso en favor do peón e non do vehículo motorizado, entre o P.Q. 0+000 e o P.Q. 0+100 da E.P. 9303 Meaño – Dena, dignificando este novo espazo público coa utilización de materiais nobres, executando a zona de convivencia en lousas e lastros de pedra. A maiores, se proxecta a intervención no pequeno vial transversal localizado na marxe esquerda da Rúa Campo da Feira, así como unha zona de acceso a diferentes parcelas nas que existen problemas de recollida de augas pluviais e é preciso resolver, actuando nestas zonas mediante a execución de zona de convivencia en plataforma única con formigón coloreado e lousas de pedra.

A maiores, a actuación introducirá no novo espazo público un mobiliario urbano actual e de deseño, co fin de favorecer tanto a estética como o uso e desfrute do novo espazo por parte da veciñanza, contemplando nova vexetación que favoreza a integración ambiental e paisaxística.

Ademais, o proxecto contempla a actualización da rede de recollida de augas pluviais co fin de acondionala ao novo deseño do ámbito de actuación, mediante a execución de novos colectores que conectarán os novos sumidoiros e reixas á rede xeral de evacuación das augas pluviais existente na Rúa Campo da Feira. A maiores, se acondicionarán as redes municipais existentes ao novo deseño da rúa mediante a execución de novas acometidas da rede de fecais, posta a cota da nova rasante dos pozos e arquetas das redes existentes, etc.

Por último, se reubican os elementos de iluminación pública existentes na beirarrúa norte, en coherencia coa nova ordenación proxectada, se contemplan novos elementos de iluminación para as beirarrúas da zona sur, e se executará un sistema de rega automático para manter a nova vexetación en perfecto estado.

### **Segunda.- Importe do convenio.**

O importe o que se refire a presente actuación ascende a trescentos setenta e cinco mil catrocentos corenta e cinco euros (375.445,00 €), máis setenta e oito mil oitocentos corenta e tres euros con corenta e cinco céntimos (78.843,45 €) en concepto de IVE, o que ascende a un



orçamento total de catrocentos cincuenta e catro mil douscentos oitenta e oito euros con corenta e cinco céntimos (454.288,45 €).

**Terceira.- Financiamento.**

As obras serán financiadas pola Deputación de Pontevedra e o Concello de Meaño mediante a achega das cantidades relacionadas de seguido:

<b>Organismo</b>	<b>Achega</b>	<b>%</b>
Deputación de Pontevedra	318.001,91 €	70
Concello de Meaño	136.286,54 €	30
<b>TOTAL OBRAS</b>	<b>454.288,45 €</b>	<b>100</b>

A Deputación financiará a súa achega con cargo á aplicación 25/456.4530.612.02 do vixente Orzamento Provincial do ano 2025.

A achega do Concello de Meaño será de 136.286,54 € (30 % do importe das obras), e que según consta no documento de compromiso de gasto aportado, se realizará mediante consignación no orzamento 2025 según o acordo adoptado na Sesión extraordinaria e urxente do Pleno da Corporación, celebrada na data 22.08.2025, de aprobación do EXPEDIENTE 27/2025, modificación orzamentaria crédito extraordinario/suplemento de crédito financiado con remanente líquido de tesouraría. (exp. 747/2025).

De conformidade co disposto no artigo 116.5 da Lei 9/2017, de 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014 (en diante, LCSP), unha vez aprobado o Convenio, e antes de aprobar o expediente de contratación correspondente, acreditarase a plena dispoñibilidade de todas as achegas que financian o investimento.

Os demais gastos derivados da actuación obxecto do presente convenio, tales como os contratos de servizo accesorios para a dirección control e seguimento da execución de obras, recuamento de servizos ou o control arqueolóxico da mesma, serán financiados pola Deputación de Pontevedra.

**Cuarta.- Incidencias no desenvolvemento da obra.**

Calquera incidencia que poida xurdir no desenvolvemento das obras e se produza un incremento do custo por excesos de medición, revisión de prezos ou por causas imprevistas que



obriguen a unha modificación do proxecto, será financiada de conformidade cos coeficientes dispostos na cláusula terceira. No caso de producirse unha diminución, sempre que a achega do concello sexa con cargo a fondos propios, será devolta a cantidade sobrante.

#### **Quinta.- Obrigas do Concello de Meaño.**

O Concello de Meaño obrígase a:

- 1) Obter as correspondentes licenzas e tramitar ante outros organismos as autorizacións pertinentes que fosen precisas.
- 2) Levar a cabo a conservación e mantemento das zonas peonís obxecto de convenio, así coma doutros servizos de carácter municipal que se executen (alumeado público, xardinería, mobiliario urbano, etc.), logo da comunicación da Deputación de Pontevedra de finalización das obras.
- 3) Antes da sinatura do presente convenio, o Concello deberá achegar á Deputación de Pontevedra o acordo adoptado polo órgano que legalmente teña atribuída a competencia conforme á lexislación propia do Réxime Local.
- 4) Darlle a adecuada publicidade a este convenio, de tal xeito que quede constancia que a remodelación da infraestrutura se levou a cabo en colaboración coa Deputación de Pontevedra.

#### **Sexta.- Obrigas da Deputación Provincial de Pontevedra.**

- 1) Correspóndelle a licitación, dirección, execución e posterior recepción das obras do proxecto de *“Humanización e mellora da seguridade vial na Rúa Campo da Feira, no entorno da Casa Consistorial. Concello de Meaño”*.
- 2) Unha vez producido o acto formal de recepción das obras pola Deputación de Pontevedra, esta porao en coñecemento do Concello, entendéndose que tal comunicación determina o momento da obriga asumida polo Concello na cláusula quinta 2) precedente, sen prexuízo das responsabilidades que correspondan ao contratista derivadas do contrato de obras e para esixir o cal, a Deputación de Pontevedra, poderá adoptar todas as medidas que considere necesarias.
- 3) Correspóndelle a obriga de remitir a información sobre o presente convenio ao Consello de Contas en aplicación do establecido no artigo 53 da Lei 40/2015, de 1 de outubro, de Réxime Xurídico do Sector Público e da súa normativa de desenvolvemento.



#### **Sétima.- Compensación de débedas.**

O Concello de Meaño faculta expresamente á Deputación para reter e compensar con cargo ás cantidades que lle poidan corresponder toda clase de débedas vencidas e pendentes de pago.

#### **Oitava.- Comisión de seguimento e control.**

Para o seguimento e control do cumprimento do presente convenio , así como para aclarar as dúbidas que suscite a súa interpretación, constitúese unha Comisión de Seguimento da que forman parte o presidente, o alcalde ou persoas nas quen deleguen, o secretario xeral da Deputación de Pontevedra ou persoa na que delegue e un representante técnico de cada Administración.

As súas funcións, entre outras, serán as seguintes:

- Impulsar e avaliar o cumprimento do presente convenio, propoñendo as actuacións que se consideren precisas.
- Propoñer a interpretación, en caso de dúbida, do contido do mesmo.
- En caso de que xurdiran controversias na aplicación do convenio, propoñer ás partes a resolución das mesmas.

Esta comisión reunirse dentro do prazo de tres días, a contar dende a petición expresa realizada por calquera das partes.

#### **Novena.- Vixencia do convenio.**

O presente convenio entrará en vigor na data da súa firma e terá vixencia ata o remate das obras obxecto do mesmo, en todo caso ata o 31 de decembro de 2026.

A vixencia do presente convenio poderá prorrogarse coa conformidade expresa das partes intervinientes.

En calquera caso os efectos económicos do convenio entenderanse ata tres meses despois da liquidación do contrato da obra, unha vez rematado o período de garantía. Calquera incremento do custo neste período será financiado de conformidade cos coeficientes dispostos na cláusula terceira do convenio.

#### **Décima.- Resolución.**

Serán causas de resolución o incumprimento das obrigas derivadas deste convenio de conformidade co disposto na normativa vixente.



**Undécima.- Normativa aplicable.**

O presente convenio ten natureza administrativa, rexéndose polas cláusulas establecidas en:

- Lei 7/1985, de 2 de abril, reguladora das bases de réxime local – Lei 5/97, de 22 de xullo, da Administración Local de Galicia.
- Lei 40/2015 de 1 de outubro, de réxime xurídico do sector público.
- Bases reguladoras da execución do orzamento da Deputación de Pontevedra para o exercicio 2025.
- E demais normativa de obrigado cumprimento.

Asemade, as partes quedan sometidas á Xurisdición Contencioso-Administrativa, a falta de entendemento previo pola comisión citada na cláusula oitava, na resolución de posibles controversias que puideran suscitar o incumprimento ou interpretación do convenio.

E en proba de canto antecede, as partes que interveñen asinan o presente convenio na data da sinatura dixital.